

CICERO PRO A. CLVENTIO.

A vobis iudices, antequam de ipsa causa dicere incipio, hæc postulo: primum, id quod æquissimum est, ut ne quid huc præjudicati afferatis. Etenim non modo auctoritatem, sed etiam nomen iudicium amittemus, nisi hic ex ipsis causis iudicabimus, ac si ad causas iudicia, jam facta domo deferemus. Deinde, si quam opinionem jam vestris mentibus comprehendistis; si eam ratio convellet, si ratio labefactabit, si denique veritas extorquebit; ne repugnetis, eamque animis vestris aut libentibus, aut æquis remittatis; tum autem, cum ego unaquaque de re dicam, & diluam, ne ipsi quæ contraria sunt, taciti cogitationi vestræ subjiciatis; sed ad extremum expectetis, & me meum dicendi ordinem servare patiamini: cum peroraro, tum, si quid erit præteritum, à me requiratis.